

Joriy yilning 17-avgust kuni TATU-BDIRU axborot texnologiyalari qo'shma fakulteti tayyorlov kurslarini tamomlagan o'quvchilarga sertifikatlar topshirish marosimi bo'lib o'tdi.

Tadbirda TATU rektori, o'quv ishlari bo'yicha prorektor, Belarusiyadan tashrif buyurgan TATU rektorining maslahatchisi, universitetning professor-o'qituvchilari, tayyorlov kurslari o'quvchilari hamda ota-onalar ishtirok etishdi.

TATU-BDIRU Axborot texnologiyalari qo'shma fakulteti qoshida TATU va BDIRU yuqori malakali o'qituvchilar tomonidan 9 oy davomida rus tili, ingliz tili, informatika, matematika, fizika fanlari bo'yicha tayyorlov kurslari tashkil qilingan edi.

Tayyorlov kurs fanlari bo'yicha imtihonlarni muvaffaqiyatli tamomlagan 71 ta tinglovchi sertifikat bilan taqdirlandi hamda muddatidan oldin **TALABA** bo'lish imkoniyatiga ega bo'lishdi!

- Biz to'qqiz oy davomida TATU-BDIRU axborot texnologiyalari qo'shma fakulteti tayyorlov kurslarida tahsil oldik. Darslar rus tilida olib borildi. Bugun judayam xursandman! Sababi, mana shu tayyorlov kurslari imtihonlaridan muvaffaqiyatli tugatib sertifikat bilan taqdirlandim. Yana bir xursand qiladigan tomoni biz endi ham TATUda ham BDIRUda o'qiyamiz va ikkita diplom olamiz. Diplomimiz nafaqat O'zbekiston, balki butun dunyo mamlakatlarida tan olinar ekan. Bu eshitib juda ham quvondim. Shuncha imkoniyatlarni yaratib bergan TATU va uning rahbariyatiga o'z minnatdorchiligimni bildiraman. Albatta, yaxshi o'qib, axborot texnologiyalari sohasida yetuk mutaxassis bo'lib, ustozlarimizning ishonchini oqlayman,- deydi o'quv kursi tinglovchisi Eshonqulova Taxmina.

Ma'lumot o'rnida aytish joizki, 2018-yil 13-sentyabr kuni Muhammad al-Xorazmiy nomidagi Toshkent axborot texnologiyalari universiteti hamda Belorussiya davlat informatika va radioelektronika universiteti o'rtasida yuqori malakali mutaxassislarni tayyorlash uchun Axborot texnologiyalari qo'shma fakultetini tashkil etish to'g'risida shartnoma imzolandi. Ushbu shartnomaga binoan 2019-2020 o'quv yildan boshlab TATUda TATU-BDIRU Axborot texnologiyalari qo'shma fakultetiga quyidagi yo'nalishlari bo'yicha o'qitishga qabul qilinishi kelishib olindi:

- axborot texnologiyalarning dasturiy ta'minoti;
- dasturlanadigan mobil tizimlar;
- sun'iy tafakkur.

TATU-BDIRU Axborot texnologiyalari qo'shma fakultetida o'qish "2+2" sxemasi asosida amalga oshiriladi, 2 yil TATUda, 2 yil BDIRUda o'qish bosqichlari kelishib olindi. TATU-BDIRU Axborot texnologiyalari qo'shma fakultetini muvaffaqiyatli tamomlagan talabalar **IKKI DIPLOMGA** ega bo'lishadi.

Ta'kidlash joizki, Belorussiya davlat informatika va radioelektronika universiteti (BDIRU) Belorussiya yirik milliy ilmiy-ta'lim markazi bo'lib, o'quv va ilmiy faoliyat olib borish uchun ulkan imkoniyatlarga ega OTM hisoblanadi. Universitet zamonaviy laboratoriya asbob-uskunalar bilan jihozlangan va rivojlangan infratuzilmaga ega. Universitetda ta'lim olish va ilmiy-tadqiqot faoliyatni yuritish uchun barcha zarur shart-sharoitlar mavjud.

TATU matbuot xizmati